



hezberri

36. alea
2010eko
Urria



Inposaketen aurrean, hezkuntza sistema euskaldun eta herritarra eraiki!

Udako oporretako haize freskoak alde batera utzita, ikasturte berria martxan da dagoeneko. Eta ikasturte berri honi adjetibo bat jarri behar badiogu, “korapilatsua” jarriko genioke.

EAEko ikastetxeetan, Celaák diseinaturiko Bizikidetza eta biolentziaren deslijitimatze planaren irakasgaiaren aplikazioa pairatzen hasiko dira. Herri honetan bizi dugun gatazkaren existentzia aintzat hartu gabe, onaren eta txarraren irakaspena eman nahi digute. Pedagogikoa al da ikuspuntu zehatz batetik abiatutako heziketa?

Nafarroako Gobernua ere ez da atzean geratu. Alde batetik, Euskal Herriaren existentzia ezabatze bidean termino hori biltzen duten testuliburuak zerrenda beltzean jarri eta diru-laguntzak kentzeko bidean da. Eta bestetik abuztuan, ikasleak oporretan daudela aprobetxatuz, ikasleen eskubideak murrizten dituzten dekretua onartu dute.

Zuberoa, Baxe Nafarroa eta Lapurdin ere, Euskal Hezkuntzak ez du bere garairik onena bizi, Estatu

Frantsesetik euskarak inolako onarpen ofizialik gabe, ikastolen egoera zailtzen ari da. Gainera, EAEko gobernuko diru-laguntzen kontua korapilatzen ari da eta iraungitze data dute gainera: 2010 urtea. Hori gutxi balitz, landa eremuen desertifikazioak aurrera darrai, eskola mapa berriak eskola txikiak baztertzen dituelako.

Unibertsitatean, Bolonia Prozesuan zeharo murgilduta hasi dute ikasturtea. Herrien beharren arabera ikasketak eta ikerketak burutzerako baino, multinazional eta enpresa pribatuen zerbitzura makurtzen dira unibertsitateak, ikasleak lan makina izatera bideratuz eta irakasleen lan baldintzen prekarizazioan sakonduz.

Lege eta inposaketa guzti hauek, Estatu-politikaren logikaren barnean kokatu behar ditugu. Doktrinamendu espainiar zein frantsesa besterik ez dute helburu. Baina legeak lege, ezarri nahi diguten

tunel ilun honetan bada argi izpi bat. Azken urteotan, Hezkuntza Sistema Nazional baten aldeko mugimendua gorpuzten hasia da. Horren islada dugu iazko ikasturteko Martxoaren 13an Bilbon burutu genuen nazio manifestaldia, adibidez.

Inoiz baino beharrezkoagoa da Hezkuntza mugimendu hori artikulatzea. Inposaketei aurrean harresi bat eraikitzeaz gain Euskalduna eta Herritarra izango den Hezkuntza Sistema Nazionala aldarrikatuko duena. Euskalduna hizkuntzaz (euskarazkoa eta euskaldunduko duena) eta edukiz (euskal nortasuna, ezagutza eta jakintzak oinarri izango dituen). Eta Herritarra, hezkuntza eskubideak bermatzen dituen hezkuntza zerbitzu publikoa: hezkidetzalea, kritikoa, pedagogikoa.

Guztiok elkarrekin lan eginda egoera honi buelta emateko gaitasuna dugu!





IKASLE MUGIMENDUA MARTXAN DA!

ATXILOKETEN GAINETIK, IKASLERIA AURRERA!

Audientzia Nazionaletik etorri den azken polizia operazioak euskal gazteria independentista izan du jomuga. Hamaika izan dira hurrengo egunetan egindako mobilizazioak eta eragile ezberdin askotatik entzun ahal izan ditugu operazioaren aurkako salaketak. Euskal Herriak Bere Eskolak ere bat egin du adierazpen horiekin eta aipamen berezia egin diogu atxilotuen artean dagoen Ikoitz Arreseren kasuari. Hezkuntza Mugimenduan aktiboki parte hartu duen laguna izan da Ikoitz, mugimendu honetako kide garrantzitsua, dudarik gabe eta bere lana beti modu publikoan garatu izanduen. Horregatik, beste behin ere, bere atxiloketa eta gainontzeko guztiena salatu nahi dugu eta gazte mugimenduari gure elkartasuna adierazi nahi diogu.



IKASLE EGUNA'10 HEMEN DA!

Amurrion ospatuko da aurtengo Ikasle Eguna Azaroaren 6an. Egun oparoa antolatzeko apustua egin dute aurten Ikasle Abertzaleakeko kideek eta egun guztiko ekimenez gain, Manifestazio Nazionala ere deitu dute. Arratsaldeko 17'30etan abiatuko da manifestazioa udaletxe plazatik "Ikasleoi erasorik ez! Hezkuntza Sistema Nazionala!" lelopean.

Manifestuari atxikimenduak

Kurtso hasieran manifestu bat kaleratu zuen Ikasle Abertzaleak erakundeak. Manifestu hartan erasoen aurrean jeiki eta Hezkuntza Sistema Nazionalaren alde egiteko ordua dela adierazten zuten. Ikasle Egunaren testuinguruan hamaika dira manifestuari beren atxikimendua adierazi dioten eragileak, horien artean dago EHBE ere.

Euskal Herriak Bere Eskolak, LAB eta Sortzen-Ikasbatuazekin batera, idazki bat kaleratu dugu manifestuari atxikimendua eman eta herritar orori Ikasle Egunean -eta bertan egingo den Manifestazio Nazionalan- parte hartzeko gonbidapena egiten diogu.

Egitarau oparoa

Esan bezala, aurten ere antolatu dute Ikasle Eguna; Amurrion izango da, Larunbat honetan. Egitarau oparoa antolatu duten arren, aldarrikapenerako eguna izango da Azaroaren 6a; inposaketen aurkakoa eta Hezkuntza Sistema Nazionalaren aldekoa. Gaua ondo luzatu arte iraungo du jaiak Amurrion, kontzertu eskaintza zabala osatu baitute.

Bertaratzeko informazioa

Kontzertutarako sarrerak zenbat balio duen, autobuserako izena emateko nora jo behar den edo beste edozein zalantza argitzeko informazioa Ikasle Abertzaleaken webgunean dago eskuragarri: www.ikasleabertzaleak.org

- LAB eta Sortzen-Ikasbatuazekin batera idatzi dugun testua irakurtzeko sartu gure webgunean: www.euskaleskola.org.
- Kale animazioa, HSNren aldeko gunea, Porrotx pailazioa, herri bazkaria, kontzertuak...





URRIAREN 12AN EZ GENUEN EZER OSPATU

Hispanitatearen eguna, Guardia Zibilarena eta Amerikar kontinenteko genozidioaren ospakizuna. Nahiko zaila egiten zaigu ulertzea inork honelako gertakizun bat ospatu nahi izatea; beraz, espainiar izango bagina ere ez litzaiguke jai egun gustagarria egingo. Baina kontua da ez garela espainiar sentitzen, euskaldun baizik eta horregatik kalendarioan egun hau gorritz markatuta ikustea inposiziotzat hartzen du-

gula. Urriak 12, jai-egun inposatua. Ez gara horrela pentsatzen dugun bakarrik, Euskal Herrian asko dira berdin pentsatzen dutenak. Horregatik, Urriaren 12an batzuk lanera edo klasera joatea erabaki zuten; beste zenbaitek Ikasle Abertzaleak antolatutako herri eskoletan parte hartu zuten; eta arratsaldean Iruñako kaleetan Independentziaren aldeko oihua entzun ahal izan zen.



Ikasle talde bat herri eskola batean parte hartzen

INDEPENDENTISTAK

HERRI ESKOLAK

Ikasle Abertzaleak eskainitako datuen arabera, 1200 ikasle inguruk hartu zuten parte Urriaren 12rako antolatutako herri eskola ezberdinetan. 40tik gora herritan antolatu zituzten hitzaldi, tailer eta ekintzen bidez

MARTXA BERDEA IRUÑAN

Simon Bolibar askatzailearen irudia aurrean gurela, milaka izan ginen Iruñeko kaleak berdez margotu genituenak. Erta/Hego ameriketako musika, batukada, trikititxa... hori guztia bandera, niki, jertse eta mota guztitako jantzi berdez apaindurik.



NAFARROAKO IKASLEEN ESKUBIDE ETA BETEBEHARREN DEKRETUA: INPOSIZIOA UDAN

Iaz jada lehenengo mugimenduak egin zituen Nafarroako Gobernuak dekretu berri hau onartzeko. Edukiak larriak badira ere, larriagoa da udako egunak erabiltzea berau onartzeko. Ikastetxeak itxita daudenean eurei dagokien lege bat onartzea ez da oso demokratikoa.

Edukiak, hala ere, kritikagarriak dira oso. Lehenik eta behin ikasleen “eskubide eta behetebharren” inguruan hitz egiten dutelako, baina errealitatean betebharra baino ez direlako agertzen. Ikasleen eskubideak zeintzuk diren jakitea zaila da, baina betebharra oso ondo agertzen dira zehaztuta. Betebhar horien zaintza irakasleen esku uzten dute, baina ez pedagogiaren ikuspegitik, baizik eta autoritarismoaren eta infantilizazioaren bidetik. Irakasleak esan beharko du zer dagoen ondo eta zer gaizki, inongo arrazoirik eman gabe.

Harrigarria da kartelen inguruan, edo adierazpen askatasunari dagozkion “arazoei” buruz zenbat zehaztaperen egiten diren eta zein gutxi berdintasuna edo ikasteko eskubidearen inguruan. Euskaraz ikasteko eskubidea ez da bermatzen, ez eta herri txikietan Bigarren Hezkuntza ikasteko errekursoak izatearena.

UPNk eginiko lege honek argi uzten du eurek dutela gobernu eta, beraz, arrazoia. Ikasleek euren ideologiarekin bat egin behar dute edo, bestela, ez dituzte betebharrekin bat egingo.

Orain ikastetxe bakoitzak bere “Bizikidetza Plana” egin beharko du. Euskal Herriak Bere Eskolako ki-deok plan horietan balio demokratikoak eta pedagogikoak barneratzeko deia luzatu nahi diogu hezkuntza komunitateari. Ikasleen eskubideak defendatuko dituen Bizikidetza Planak behar ditugu, ez betebhar eta zigor diziplinarioen zerrenda bat.

Hezkuntzak ez dio jendeari zer pentsatu irakatsi behar, pentsatzen irakatsi behar dio.



Informazio gehiago:

www.euskaleskola.org

eskola@euskaleskola.org

CC
SOME RIGHTS RESERVED



Hezberri Euskal Herriak Bere Eskolaren hilabete-karia da. Bertan dauden eduki guztiak edo atalak libreki partekatu eta zabaltzeko eskubidea duzu beti ere honako baldintzak betetzen badi-tuzu:

- Jatorria aipatzea.
- Era berdinean partekatzea.